

ألف نيلة و نيلة

مصطفى عامر

أحمد السعيد



أحمد السعيد _ مصطفى عامر

رقم الإيداع / ١٣١٩٥ / ٢٠١٣ ط ١

التزقيم الدولي / ٨ - ٣٦ - ٥٣١١ - ٩٧٧ - ٩٧٨

غلاف محمد أسامة

الإشراف العام / إيمان سعيد

هيئة تحرير ومراجعة

د/ سالم إبراهيم

أ/ رشا زقزق

أ/ محمود السيد



ليليت للنشر
والتوزيع

حقوق الطبع محفوظة لدى الناشر

ليليت للنشر والتوزيع

المراسلات : ٦٠ ش سكنية بنت الحسين

كفر عبده / الإسكندرية

مول الوطنية التجارى - الدور الثانى

ت : ٠١٢٢٤٢٧٢٣٢٢٧

: ٠١١٤٤٥٩٥٧٥٧

Dar.lilite@gmail.com

lilettepublishing@gmail.com

www.publishinghouse.com



دار الكتب المصرية
فهرسة أثناء النشر إعداد إدارة الفنون الفنية

دار الكتاب المصرى

أحمد السعيد، مصطفى عامر

ألف نبلة ونبلة

دار ليليت للنشر والتوزيع ٢٠١٢ ط ١

ص ٢٠١٣

تدمك / ٣٦-٣١١-٥٣١١ - ٩٧٧ - ٩٧٨

رقم الإيداع / ١٣١٩٥ / ٢٠١٣

إلى كل من علمنا حرف
إلى كل من علمنا درس
إلى كل من ساعدنا على إيجاد طريقنا
إلى كل من أنار الطريق إلينا نحو دربنا
إلى أب وأم كل منا..

.. شكراً

أحمد ، مصطفى

obeikandi.com

الكتابة بالعامية..

مش بس بتغير طريقة كتابة كتير من الكلمات بل,
كمان بتفرض في أحيان كتير كسر بعض قواعد اللغة
كسرًا صريحًا .. واضحًا
وبتبان المشكلة دي خصوصًا لما تختلط العامية بفصحي سليمة
كما في هذا الكتاب ..
برجاء مراعاة التشكيل لقراءة ما كتب كما كتب
أو في الحقيقة .. كما قيل

أحمد العسيلي

obeikandi.com

إستعناع الشقا بالله

إحنا اتعلم علينا ..؟! لما صاحبك يسألك ليلة العيد .. حاتتحرش
فين السنادي !! لما بنطلونات البنات تبقي للوقوف بس .. لو تقعد بيها
حاتنفجر..وتسأل .. إزاي اتلبست .. وإزاي حتتقلع ؟

لما تسقط بنطلونك .. وفتتكر إنك نسيت تلبس البوكسر .. أوبالا
.. لما تحس إن البنات كلها شبه بعض .. وتسأل مصر ضربت بالنووي
إمتي ؟ لما تلاقي رجل دين متورط في فضايح جنسية .. وراقصة بتقرأ
قرآن قبل نمرتها .. إنت أول ما أختك تيجي جنبك تقلب من ميلودي
لقناة الناس .

لما الحجاب يتلبس علي البرمودا .. و يبقى فيه مايوه شرعي و مايوه
عربي .. !! لما الحب دلوقتي يبتدي بـ «أكثر حاجة بحبها فيكي قلبك و
طيبة قلبك» وينتهي بـ «اعتذري للي حايجي بعدي»

لما وديع يسيب مدام رشا لتهامي باشا .. و مانعرفش عملوا إيه بعد
كدا إذا أهلاً و مرحباً بك في ألف نيلة و نيلة ..

obeikandi.com

في أمل

عرفتم أن عندي ١٦ سنة؟ " ماتستغربوش " هتقولوا لسة صغير إنتو شايفين كدا.. بس أنا مايمنيش كلام حد أنا شايف إني أكبر من كدا.. كل واحد يبدأ سنه من تمتاشر أو مايزيد هيقول إننا لسه صغيرين ولسة قدامهم مشوار طويل " دا علي أساس إن حضرتك في يوم من الأيام مكنتش صغير مثلاً و كان عندك حلم "

سنا اللي هو ستاشر أو خمستاشر سنة أو أقل من كدا مثلاً دا سن يجب علينا أن نفتخر بيه .. ليه .. ! لأن احنا المستقبل لازم نفكر و نحلم و نفتخر بـ دا لاننا إحنا اللي هنهض بالبلد .. وبعدين النهضة حلوة مفيش كلام ..

لسة في أمل في مصر إن الشوارع تبقي نضيقة و في أمل إن الناس تغير من نفسها .. في أمل إن المدرسين في المدرسة تشرح بضمير و إن طوابير العيش هتتحل .

في أمل إن الزحمة تقل و في أمل إن موظفين الحكومة يبقي عندهم دم شوية .. إلخ إلخ إلخ

أرجع و أكمّل كلامي و أقول إن للأسف معظم الناس بتحتقر سننا أو ممكن يسمعوننا بطريقة ثانية ممكن نغير اللي حوالينا ليه لأ ..؟! ممكن ابتسامه ... ممكن كلمة حلوة ... المفروض نمشي في الشارع رافعين راسنا فوق وعلّي وشوشنا ابتسامه حلوة تحسنا وتحسس اللي حوالينا بالأمل و التفاؤل ليه لأ ..؟! بإيدنا نعمل كل دا .

ممكن نصلح الفساد اللي حوالينا لو مقدرناش الاسم إن إحنا حاولنا طب ليه مصر ماتكونش حلوة و نضيفه و مفيهاش فساد و ظلم و عبودية و وطواير عيش ..؟

الكل بيقول إننا ما نقدرش نغير حاجة عشان معندهمش أمل في ربنا ..! أحب أقول لكل واحد فيكم إننا هنتغير و هنتغير إلیي حوالينا خلي أملك في ربنا كبير عشان " في أمل " ..

صبر القلوب

وقفت أتأمل حالات معيشة يقتلها الفقر حالات بؤس و شقاء عايشها قلوب كثير من الناس...ورغم كل البؤس اللي بيعانوا منه لاقيتهم صابرين علي كل متاعب الحياة لان الصبر دا من عند ربنا، وربنا وضع صبر بدون حدود في قلوب الناس دي بيخليهم راضين بأقل حاجة يوفرهم قوت يومهم، و يسترهم في دنيتهم اللي مش بتديهم إلا حاجة قليلة جدًا.. لكن العطاء من عند ربنا ومن أصحاب الخير اللي بيطلعوا من معاهم من زكاة المال ليهم .

كنت بنزل عشان أشوف الحالات الفقيرة من الناس واللي وصلت لمرحلة الشقاء والتعب في حياتهم. وكنت بدور بينهم وبدخل و بخرج من بيوتهم وعلامات التعجب و الحزن مرسومة على وشي و أسأل نفسي ازاي الناس دي عايشة يومها ...؟ وازاي شايفين مستقبلهم و مستقبل أولادهم ...؟

ولقيت الإجابة عندهم لما اتكلمت معاهم و حسيت بالصبر اللي في قلوبهم اللي غلب حالة الضنك اللي عايشنها ... لقيت بيوت بسيطة جدًا وأقل من بسيطة فيها أوضة واحدة بس وفيها أكبر عدد من أفراد

الأسرة (أم - أب - أولاد) واللي عددهم لا يقل عن خمسة أولاد ونضيف معاهم الجدة و الجد، كل دول في أوضة صغيرة والأب بيجري علي أكل عيشه عشان يأكل العدد الكبير اللي في أسرته .. وبالإضافة إلى إن دخل الأب مش بيكفي احتياجات مراته ولا أولاده ولا حتي والدته من أكل و لبس و شرب و مصاريف و تعليم أولاده شفت في عيونهم المستقبل اللي يوصلهم لهدفهم و يتخرجوا منها ويكون معاهم شهادات و يفرحوا والدتهم ووالدهم . و يستلم كل واحد فيه شغله اللي يقدر يعيشرهم و يعيش أبوهم عن كل ما بذلوه من جهد في أكلهم و لبسهم و تعليمهم، لكن حالة فقرهم الشديد بتخليهم مايقدموش لأولادهم في دخول المدارس عشان كتره المصاريف حط نفسك مكانهم ! ..

الحالات الصعبة دي من شدة فقرها بتسحب أولادها من المدارس هتجيلهم مصاريف منين !..

الحالات دي كنا بنبحث عنها في مشروع إنسان من حيث المعيشة اللي فيها أطفال متسربة من التعليم؛ عشان نقوم بمساعدة الحالة اللي محتاجة و عملنا قافلات طيبة و غذائية و معارض ملابس بالرغم من إننا حاولنا نسعدهم، حسيت بكم السعادة والرضا اللي في قلوبهم الصابرة و الراضية لما شفت الناس البسيطة الطيبة دي، وإحساسي بالصبر

الموجود في قلوبهم !! كنت بدخل و أخرج من كل بيت وأنا بردد كلمة » الحمد لله « الحمد لله علي السراء و الضراء حسيت إني في نعمة كبيرة مش حاسس بيها. بس جه الوقت اللي حسيت بيها، لكن كل واحد واجب عليه إنه ماينساش الناس دي، وماينساش العيشة البسيطة اللي عايشنها؛ عشان كل واحد يحس إنه في نعمة كبيرة ربنا عطاها له عشان يحمد عليها ...

أد إيه جميل إن احنا نشتغل لوجه الله و نحس بالمحتاج و نساعده ولو بأقل حاجة ممكن تقدر تقدمها له. الاحساس دا ممكن ينتج عنه مكاسب كتيرة للي بيشغل لوجه الله. وأهم حاجة هي مصالحة نفسك أول بأول قدام ربنا و إحساسك بنعمة و رضا ربك. أتمني إن كل واحد يكون عنده إحساس أو شوية دم من صبر القلوب كفاية كدا !!!

فرح مصري

إزاي تعرف إنك في فرح مصري ..؟

لما تقرا عبارة " جنة الاطفال منازلهم " علي دعوة الفرحة
ولما تشوف الزفة الدمياطي الأزلية " وبسم الله الرحمن الرحيم وهنبده
الليلة " .. لما تلاقي العريس يبخر العروسة والعكس صحيح .. ولما تلاقي
الستات بينمو علي العروسة ويقولو عبارات زي " أنا عارفة ياختي
أخذها علي ايه" أو " فستانها بيئة اوي "

لما تلاقي أغنية هشام عباس " أسماء الله الحسني " هي أول حاجة
تسمعها وأنت داخل القاعة .. لما تلاقي المصور " بيزوم " علي الشبكة
وكأنها قلادة التايتنك الماسية " وتلاقي المدعويين هيموتوا ويتفرجوا عليها،
لما تلاقي العريس و العروسة بيرقصوا مع بعض رقصتهم الأولي الرومانسية
وكل الناس بيصوروهم بكاميرا الموبايل وهما يقولوا " يا تري يقولها إيه «
لما تلاقي أم العريس كل نص ساعة بتمسح عرقه وبتقول " يا بني مش كذا
متهدش نفسك "

ولما تسمع السؤال الجميل " هو البوفيه هيفتح إمتي " ؟ الواحد جاع
وياسلام لما تلاقي فيلم تسجيلي بيعرضوا فيه البوفيه وما يحتويه من لحوم

ألف نيلة ونيلة

وفراخ وديك رومي ... ولما تسمع الست بتقول " بس الأكل مكانش قد
كدا " بعد ما أكلت الاكل علي طول وعلي رأي المثل " بعد ما أكل و
إتكى قال رحته مستكة "

لما تقول أم العروسة للعريس " خلي بالك منها ويقول دي في عنيا يا
طنط " ولما تطلع الزفة مسببة الإزعاج لخلق الله و بييب بييب بييب
بييب....عرفتوا بقا امتى تعرف أنك في فرح مصري؟!

الوقت من ذهب ولا من نحاس ؟

نفسى أعرف ليه المصريين مايعرفوش يحترموا الوقت وبيتعاملوا معاه علي أنه مش من ذهب، لكن من نحاس أو حتي صفيح !
من وسط ١٠ مواعيد تلاقي واحد مضبوط والباقي كله مضروب
تلاقي الواحد بيكلمك الساعة ٥ ونص في سيدي جابر " إسكندرية
"مثلاً وبيتفق معاك علي إنه يقابلك الساعة ٦ في المنذرة مثلاً . . . طب
تيجي إزاي؟! مفيش إحتمال ١ في المية إن الدنيا تكون زحمة أو الكوبري
يكون واقف مثلاً لأي سبب، المهم تلاقي الشخص ده واصلك الساعة ٦
ونص ولا سبعة وهو بيتمختر، ويقلك معلش أصل الكوبري كان واقف
" لا يا شيخ و هو من إمتي مكانش واقف !"

من خلال تعامللي مع شوية ناس برا مصر. خير اللهم اجعله خير
كدا الوقت عندهم غالي أوي ولو بصيت علي البلاد المتقدمة هتلاقي إن
احترام الوقت دا عندهم زي الأكل و الشرب؛ لو اتأخرت ٥ دقائق على
معادك يقابلك شخص وهو مكشر و لاوي بوزه و ازاي وازاي لطعته كل
الوقت دا .. شفتوا الفرق؟ النوم بمعاد والخروج بمعاد مش الوقت اللي
عمال يتسرب من بين ايدينا واحنا مش حاسين.

ألف نيلة ونيلة

عشان كدا حياتنا متكعبة ومكركبة؛ ننام في أي وقت ونقوم في أي وقت نتأخر علي الشغل، ناكل في مواعيد غريبة، و دايمًا دايمًا ما عندناش وقت نلعب رياضة ولا حتي نزور قرايبنا !

والحل ببساطة هو النظام؛ لأن النظام هيحللنا مشكلة الوقت ولو مشكلة الوقت اتحلّت كل حاجة هتتحل .. كفاية هرجلة بقا ..

يا تري لما قرّيتوا الكلام دا عرفتوا الوقت عندكم من ذهب ولا من نحاس؟!

هموم مواطن مصري

كل يوم أسأل نفسي عندما أرى أزمة مواصلات وغلاء أسعار ومعاناة للجميع ، سؤال يفطر قلبي عندما أرى من يخربون شركاتهم أو مؤسساتهم لمجرد بعض العُمُلات، سؤال يجعلني أشعر بالندم لوجودي في مجتمع لا يرغب في التغلب علي ازماته واللحاق بركب الاخرين .. سؤال يقتل كل حلم بداخلي عندما أرى معظم أحلام الرجال و النساء لا تتعدى الأمور الاجتماعية؛ كالزواج والحب ورعاية الأولاد.. سؤال يجعلني أفقد الثقة في كل شخص علي أرض مصر لأنني لم أعد أرى القدوة في المجتمع.. سؤال .. نعم هو سؤال واحد، ولكن مؤثراته بالملايين.

مؤثراته: تخلف و أنانية وفقر مع تناقض أشد قسوة، و هو الغنى الفاحش والثراء علي حساب ودموع وغش الآخرين .. سؤالني يا أحباء مصر العروبة و الإسلام، سؤالني يا أحباء مهد الحضارة و العلم في ثلاث كلمات لا غير.. مين بيحب مصر؟ وهو ولا أقصد البشر، ولكن المكانة والعزة و الكرامة.

فهل يعقل أن دولة تعدداها أكثر من ثلاثة و ثمانون مليون تتسول علي موائد اللئام .

وهل يعقل أن نستورد كافة احتياجاتنا من دول أقل منا في كل شيء
مثل القلبين وفيتنام !!، وهل يعقل أن نظل نعبد كل أصنام العالم من
أجل الطعام، وفي الحقيقة نحن نعيش مأساة، ولكن لا نشعر بها ...

لأننا تبلىد الحس عندنا وأصبح اليوم كالأمس و الغد تنتظره ولا نعد
له شيء، طموحاتنا المأكّل و المشرب والمذات، أو الثراء الفاحش بأي
طريقة حالتنا تستعصي علي أحسن طبيب نفسي .

فنحن نعيش علي وطن أكاد أجزم أننا لا نجبه ولا نشعر بالفخر
بالانتماء له وإلا لماذا هذا السكون في حياتنا؟ لماذا تقبل بكل ما يقدم لنا
ولا نسعي لرسم ما نريده؟

أسئلة كثيرة تدور في رأسي، و رأس كل شخص علي هذه الأرض علي
هامش سؤالي الأساسي، منها ما هو مباح ومنها صعب البوح به، عموماً
نحن في حالة جفاء مع مصر، مصر الأرض التي تحتضنا فاعتبرها بعضنا
ليست سوى مزار يأتي الآخرون لمشاهدته .

ومصر الشرف والتي اعتبرها البعض أيضاً سوق للمتعة واللحم
الرخيص والنخاسة و مصر العمار والتي في نظر البعض ليست سوى
عقار فاخر اشترى أرضه بالملايم، و يرغب الربح من وراءه الملايين .

ومصر هبة النيل والذي لا يري بعض أعمياء القلوب أنها ليست
سوى مطعم عائم وجزيرة يحيط بها الماء .. و مصر أم الطب والتي
تحولت بقدرة قادر لتجارة أعضاء بشرية و تخويف من الآلام وهمية .

ومصر السمرء واللي يعتبرها غالبية البسطاء والفقراء ليست سوى
بكته بانجو وقرش حشيش... أستغفر الله العظيم، ومصر الثقافة والتي لا
تعني للمتقفين سوى سبوبة منها يعيشون علي نسج الأساطير والتمجيد
في الفاشلين .

عمومًا سكوت أمنا مصر لن يطول والأيام حبلى بغدٍ صعب على
الجميع .. لأن هذه سنة الله في الكون فالمتقاعسون الذين لا يبحثون
عن الغد المشرق الذي تضيئه العدالة الاجتماعية وتحضنه الآمال
والطموحات، ويكون في أعلى نقطة فيه العلماء وأصحاب الضمائر مصيرهم
معروف ومكانتهم محفور عليها أنكم في مزبلة التاريخ ..

أي كلام فاضي معقول

في الموضوع الصغير دا هكتب بنبرة تدعو للتفاؤل علي الرغم من عدم وجود شيء يدعو للتفاؤل في وطننا. عمومًا وبعد الصلاة علي النبي أنا حاسس إن فيه أمل .. تقولي في ايه أقولك يا صاحبي في كل شيء بدءًا من المجاعة التي ظهرت بوادرها في مصر نهاية بأزمة العراق و فلسطين .

وطبعًا دا كلام واحد لسة ماشريش مَيّة معدنية من المضروبة اللي ملت مصر... ولا شرب حاجة أصفريكا ولا أحمرىكا ولا قعد مع بتوع الشيكايكا « السياسة » تقولي ازاى ياعم الفايق والرايق ؟

أقولك ببساطة وبعيدًا عن نظرية التوريث وحدوتة المؤامرة. في شيء اسمه مؤشرات والمؤشرات دي ممكن تشوفها علي واحد عنده برد في أول ثلاثة أيام تبدأ صحته في الانهيار، وبعد كدا تحس أنه هيخلص ويودع وما بين ارتفاع درجة الحرارة والمعاناة، فجأة تلاقي هذا الشخص العرق غرقه وبدأ يفوق .

و دا اللي حصل معنا، ولكن الموضوع طول من النكسة أو وكسة ٦٧ وانتفاضة حلاوة الروح في ٧٣ وبدء عملية الانهيار في كل شيء

علي الرغم من وجود قرشين حلوين عندنا. لو عند فلاح من ولاد أبو اسماعيل كان عرف يشغلهم ويسترزق من وراهم، لكن احنا بهبل أهلنا روحنا حطناهم عند أعدائنا وهو اشتغل و شغل عياله وفي الآخر شكله هيصرب .. العوافي عليهم، و سلم لي علي القيم والمبادئ وشغل التلت و رقات. والراجل يعرف يرجع حاجة من القرشين. لأن الغرب اللي اخترعوا المكينة الكهربائية، نجحوا اخترعوا كان منفضة الإرهاب والمنفضة ما شاء الله ليها ثلاث استخدامات يعني ٣ في ١ .

أول استخدام أنه يشكك في ديننا، وطالما الشخص ما عندوش عقيدة يبقي مالوش لازمة .

الاستخدام الثاني أي قرش يطلع من عندنا يروح ليهم يبقي بيدعم الإرهاب ولا بد من إعادة تصحيح مساره ويروح علشان يكبر ويقوي البلطجي اللي اتزرع وسطنا وهو الكيان الصهيوني .

وثالث استخدام ودا المهم أن أي شئ عندنا مباح بدءًا من الأرض ولحد العرض لدرجة أن كل حاكم عربي يقول في سره حادي بادي سيدي محمد البغدادي مين هيجي الدور عليه المرة دي ! عمومًا من الواضح أن اللي بيحصل هو لآخر أيام البرد وبعديها هنعرف و هنفوق؛

لأن البشائر ظهرت أو على رأي محمد بن الترة نشفت وظهرت قراميطها جمع قرموط يعني. وهو نوع من ثعابين البحر طبعًا كلكم عارفينو والبداية كانت في مصر لما وقف الملط وقال بالصوت العالي البلد مليانة فساد، وبعديها ما صدقت كل الجرايد وهات يا فتح ملفات والبداية كانت تحويل بتوع الأسمت للنيابة العامة، مع أي كنت أمني أنهم يحطوهم في خلاطة خرسانة لحد ما يعترفوا الشيكارة بتتكلف قد أيه؛ علشان تعرف الجشع وصل لحد فين وفي الوقت نفسه الحصار علي غرة فشل بامتياز. ومؤامرة أبو العبس وأتباعه بتوع بارات تل ابيب فشلت بجدارة، وثبت أن الأسلاك ما تفرقش حد، و أن العربي لو نفذ التراب اللي عليه وصحح ما يقفش قدامه أي شئ أو بمعني ثاني ياخذ دش ويغسل قلبه بليفة أو بحجر ويحط في عنيه ذره ملح ولا صبغة يود؛ علشان يحس ويشوف أخوه أيه اللي بيحصله ويسويه شويه من الشات والجري ورا الستات والعري اللي في القنوات، ويحاول يعمل شوية لأخرته لأن مافيش شئ مضمون؛ لأن ماشاء الله، كل دول الخليج بيتنافسوا علي اللي يجيب صواريخ وطائرات وعلي عمل قواعد عسكرية عندهم؛ كأن أمنا الغولة رجعت من ثاني و متصورين أنهم بيحموا مغارة علي بابا في حين أنهم بيسلموا الفار مفتاح الكرار متصورين أن عدوهم هيكون أحن عليهم من إخوانهم في الدين والعروبة. و دا يؤكد أنهم تم برمجتهم بشكل عكسي. وأن الخوف إنهم يرجعوا كما كانوا أصبح مسيطر عليهم. مع أن الرسول ترك لهم الحل في كلمتين لو لسة موجودين في عقولهم لاناموا

مطمئنين؛ داوو مرضاكم بالصدقة وحصنوا أموالكم بالزكاة. مش بباتريوت
ولا اف ١٦ ولا عسكري فرنساوي ولا أمريكي سكران.

تحقيق أحداث قطر البدرشين

قررنا اليوم فتح باب التحقيق مع الجاموسة المتسببة في حادث قطار البدرشين .. المهمة أتت إلينا في سيارة نصف نقل متأخرة نصف ساعة لأنها : كانت مشغولة في سوق البهائم صباحاً

س: اسمك؟

ج: جاموسة

س: أين كنت قبل لحظة وقوع الحادث يا جاموسة؟

ج: بعد إذنك يا بيه بلاش شتيمة وقلة قيمة.. إيه جاموسة دي؟

س: هذا اسمك المسجل لدينا.. أكرر.. أين كنت قبل لحظة وقوع

حادث القطار؟

ج: أنا كنت في الغيط بتاع صاحبي الحاج حمدان وقاعدة آكل

ومزاجي عنب ومكنتش أعرف أن هيحصل ده كله .

س: وما الذي حدث؟

ج: أنا قلت أروح أسلم على الجواميس أصحابي في غيط الحاج

طلبة اللي على الناحية الثانية من القطر عشان سمعت من ناس أن

فيه أمراض جديدة وصلت للبهائم.. قلت أروح أظمن.. أي نعم وزارة الزراعة نفت الموضوع.. بس هوه مين فينا اللي بيصدق الحكومة يابيه؟

س: وما الذى حدث بعدها؟

ج: كنت ماشية على مهلى عادى وأنا على شريط القطر لقيت فيه حته صفيحة جاية من بعيد .

س: هل تقصدين القطار؟

ج: يابيه أنا بصراحة ماعرفتش أنه قطر إلا من زمارته.. إنما هوه باين من بعيد إنه صفيحة زى بتاعة السمنة كده.. وكان فيه ناس كثير متشغلين فيه من كل جانب.

س: ولماذا لم تتحركى بعيداً عن القطار؟

ج: يابيه وأنا هاخاف ليه بس؟؟ أنا لا خدت فلوس من بنوك وهربت، ولا خدت رشوة فى مشروع «ابنى بيتك»

س: ولماذا لم تفعلى ذلك؟

ج: عشان أنا مش محتاجة بيت.. أنا ساكنة فى دوار الحاج حمدان .

س: لا أقصد ذلك.. أقصد لماذا لم تتحركى من أمام القطار؟

ج: يايبه هوه فيه قطر يخاف من جاموسة؟ ليه هوه قطر لعبة؟؟
المفروض إن أنا اللي أخاف من القطر.. بس بصراحة لقيت شكله
ميخوفش وباين عليه عايز إعادة هيكلة.. قلت يابنت امشى على مهلك .

س: وماذا حدث بعد ذلك؟

ج: لقيت القطر وقف أول ما السواق شافنى .

س: ولماذا توقف القطار؟

ج: الشهادة لله أنا قلقت وتخيلت إننا فى الهند والسواق هندوسى..
بس رجعت وقلت فوقى يابت.. انت ف مصر.. والدليل القطر
الصفيح اللي قدامك ده!

س: وهل توقف القطار كثيرًا؟

ج: بصراحة سواق القطر كان راجل ذوق واستنى لحد ما مشيت على
مهلى.. حد يلاقى دلع وما يتدلعش يايبه؟

س: وهل رأيت القطار الآخر؟

ج: وأنا بابص كده لقيت صفيحة تانية جاية من بعيد ورا القطر

الأولاني وقاعدة تزمر برضه.. حاولت انبته سواق القطر وقعدت أجعّر بصوتي وكل ما اجعّر يشاور لى ويقول لى: امشى براحتك على أقل من مهلك .

س: وما الذى حدث بعدها؟

ج: القطر التانى لبس فى القطر الأولاني ومات شوية ناس كده .

س: كم عدد المصابين والقتلى؟

ج: أنا مش عارفة العدد بالتحديد بس بيتيألى انهم أقل من عدد الغرقانين فى عبارة السلام ومن عدد المحروقين فى قطر الصعيد اللى فات ومن عدد معتقلى الإخوان.. وأكثر من عدد المحروقين فى قصر ثقافة بنى سويف.. يعنى ممكن كده يبقوا قد اللى انتحروا السنة اللى فاتت من الفقر!

س: يبدو أنك مهتمة بأحوال البلد السياسية؟

ج: كله حصرى على التلفزيون المصرى.. والبركة فى النايل كوميدى والأستاذ عزب شو .

س: هل كنت تتوقعين أنك ستكونين سببًا فى إقالة وزير؟

ألف نيلة ونيلة

ج: والله لو أعرف يابيه كنت جبت كل الجواميس أصحابي بعدد
الوزرا!

س: هل أنت منضمة لإحدى الحركات المعارضة؟

ج: كفاية يابيه

س: إذن أنت تعترفين بانضمامك لحركة كفاية؟

ج: يابيه أنا اقصد كفاية أسئلة.. هيه الواحدة ماتفكش معاك
بكلمتين؟

س: فى رأيك من المسئول عن هذه المأساة؟

ج: أولاً أنا باسجل اعتراضى.. فىن المأساة دى؟ دول شوية مصريين
ماتوا.. وبعدين احنا متعودين إن كل سنة الحكومة تعمل لنا مفاجأة
كده زى موضوع القطر عشان نعتبر ونتعظ ونقرب من ربنا ونتذكر
الموت.. أنا باطالب الإعلام بعدم تهويل القضية وياريت نلتفت
لمشاكل البلد الكبرى والتحديات المقبلة زى مباراة مصر وأسبانيا أو
مصر وإيطاليا.. بلاش تشويه لسمعة مصر بقى!

س: ما الشيء الذى ندمت عليه بعد هذه الحادثة؟
ج: إنى لحد دلوقتى ما اتظمنتش على البهايم اللى ف غيط الحاج
طلبة!

س: هل لديك أقوال أخرى؟
ج: أنا بس عايزة أطمئن زملائى: الأخ «ماس كهربائى» والأخ «مختل
عقلياً».. إن الحمد لله الضغط خف عليهم وبقينا فى الهوا سوا..
وإننا هنعاول الفترة الجاية نقسم المصايب علينا عشان الشعب
يصدق.. مرة ماس ومرة مختل ومرة جاموسة.. وهوه ده الفكر
الجديد!

س: لقد تسببت فى مقتل العديد من شعب مصر والسخط فى كل
أرجاء المحروسة.. فلماذا فعلت كل ذلك؟
ج: «من أجلك أنت» يابيه!

الثانوية العامة

الثانوية العامة كابوس تعليمى مصرى بحت، يخضع له جميع طلاب التعليم فى مصر، ويعمل على حشر دماغ الطالب بكمية ضخمة من المعلومات التى عفى عليها الزمن فى كافة فروع العلم، وضعها أساتذته متخصصون فى التعقيد، حاصلون على دكتوراه فى علم النفخ، ورغم قيام الثانوية العامة على مبدأ التخصص ما بين الدراسة العلمية والأدبية، إلا أنه يجب على طالب المجال العلمى أن يدرس مادة أدبية، ويجب على طالب المجال الأدبى أن يدرس مادة علمية ! الأمر الذى يسبب الكثير من (القفلت) فى أدمغة الطلاب .

يصاحب الثانوية العامة حالة من الإفلاس العام فى خزينة رب الأسرة المصرى، هذا الإفلاس الذى يتزامن مع شهر سبتمبر من كل عام حيث يبدأ موسم الدروس الخصوصية للثانوية العامة، والدروس الخصوصية هى الأخرى ظاهرة مصرية خاصة نشأت نتيجة تحول المدارس الحكومية عن الاهتمام بالتعليم وتحولها لما يشبه النادى الاجتماعى، حيث يتفرغ المدرسون الرجال للتدخين والتحدث عن النساء و آخر أخبار الدورى المصرى بينما تتفرغ المدرسات لتقشير الخضار والتحدث عن الأزواج وآخر أحداث المسلسلات التركية، بينما يتفرغ الطلاب

للعب الكرة في ملعب المدرسة رغم تحوله لما يشبه الحارة الصغيرة بعد استغلال أرضه لبناء فصول لتسع للطلبة الوافدين .

ويرتبط بكابوس الثانوية العامة ظهور بورصة خاصة بأسعار الدروس تنافس البورصة المصرية، حيث يرتفع سعر سهم الدروس الخصوصية ولا ينخفض أبداً على عكس البورصة المصرية، ويقبل الأهل على إلحاق أبناءهم بالدروس الخصوصية التي يشتهر عن مدرسيها العنف والقسوة والقدرة على إكالة الإهانات والضربات الموجهة للطلبة، بينما يقبل الشباب على الالتحاق بالدروس الخصوصية لدى المدرسين أصحاب المجموعات المشتركة (بنين وبنات) أملاً في فرصة (تظيفط) كائن حتى اسمه العلمي (أنثى) واسمه التجاري (مزه) يتعاطى الشيبسي .. موطنه الأصلي الفيس بوك ويقضى وقت فراغه في دهان وجهه بمساحيق التجميل .

فرص العمل

فرص العمل هو الاسم العلمي لتلك الحالة الفريدة من نوعها التي تصيب الشباب المصرى فى الفترة ما بعد التخرج من الجامعة وحتى سن اليأس فى الحصول على وظيفه مناسبة. أما الاسم التجاري لهذه الحالة فيمكن اختصاره فى مصطلحات عدة كـ (الكوسة) أو (الرشوة) أو (تفتيح المخ) ...

ويرتبط بمصطلح (وظيفة) العديد من المصطلحات الأخرى، كمصطلح (CV) وهو مصطلح يطلق على تلك الورقة التي يكتب فيها الطالب عددًا لا نهائيًا من الخبرات التي لم يحصل عليها والشهادات التي لم ينلها والتقديرية التي لم يحصل عليها، ويجب أن يتم كتابتها باللغة الإنجليزية، وهى لغة أجنبيه لا يجيدها نصف المتقدمين لسوق العمل، مما يدفع الشباب لنسخ ملفات وورد مخزن عليها CV جاهزة، حصلوا عليها من خلال (فلاشة) من شاب نجح بمعجزة ما فى الحصول على عمل، ومن ثم يقومون بالتعديل فى الاسم ويقومون بإضافة اسمهم وطباعتها من جديد .

وهكذا تصبح جميع الـ C.Vs الموجودة لدى أصحاب العمل نسخًا مكررة من بعضها مع اختلاف الأسماء، حتى أننى لن أندعش إن خرج

علينا الدكتور ببرنامجته الشهيرة مكتشفاً أول CV شئ في التاريخ وقد كتبها الشاب (دايخ - رع) على ورق البردى للتقدم لوظيفة أمين مخازن بمنطقة الأهرامات لدى المعام (مفترى - حور) .

وينتج عن تقديم السى فى حدوث ما يعرف بـ(الإنترفيو) .. وهو اجتماع مغلق يسعى فيه صاحب العمل لإثبات أن طالب العمل مجرد وغد آخر يريد أن يحصل على المال مقابل لا شئ، بينما يسعى طالب العمل لإثبات أنه فهلوى و (يفوت فى الحديد) ولا ينتظر سوى فرصة جادة .

الجواز

الزواج هو ارتباط يجمع بين فتاة بيضاء البشرة متوسطة القوام تجيد الطهي وتشارك في الأثاث وتقدس الحياة الزوجية وشاب أسمر البشرة ذو شكل رياضي، لا يدخن، ويصلى بانتظام .

والزواج في مصر يختلف عن الزواج في أى دولة أو مجتمع آخر، ويقوم بالأساس على توجه الشاب مع أهله لمنزل فتاة لا يعرفها ولم يرها ويقوم بالتقدم لخطبتها بناء على توصيات ممن يعرفون به (ولاد الحلال) .

في منزل العروسه هناك من يعرف به (أبو العروسه) وهو رجل ضخم الحجم لا يكف عن إثقال كاهل العريس بكل ما لذ وطاب من الطلبات، بداية من ضرورة توفير شقة مناسبة ونهاية بضرورة شراء العفش من أستراليا، وبين كل طلب والآخر لا يكف عن ترديد عبارة (إحنا بنشترى راجل وميهمناش الماده) .

وفي منزل العروسة أيضًا هناك كائن آخر يعرف به (أم العروسة) وهى كائن حى أنثوى مهمش لا يكف عن الابتسام .. موطنه الأصلي المطبخ ويجيد عمل الشاى وتقديم الجاتوه والدعاء بأن يتمم ربنا بخير ويتم

الاحتفال بالعريس والعروسة في احتفال شعبي يعرف باسم (الفرح) يتكون في الأساس من عريس يرتدي ي بدلة سوداء وعروسة ترتدي فستاناً أبيض يتبادلان الرقص بأقصى قوة وسط الأصدقاء الذين يتنافسون في إبراز جهم للعريس والعروسة من خلال هز أوساطهم بحماس على أنغام أغاني سعد الصغير . بينما يجلس كبار السن على مقاعد بعيداً عن صوت الغناء يتغامزون عما سيحدث بعد الفرح ويتذكرون أيام الزمن الجميل .

أما شقة الزوجية فهي أسطورة مصرية قديمة تحكي عن أن كل زوجين كانا يسكنان في منزل منفصل، واندثرت هذه الأسطورة في مصر مع بداية التسعينات، حيث بدأت الشقق في استضافة المتزوجين حديثاً بالإضافة لوالدهم ووالدهم وأقارب الدرجة الأولى والثانية .

وبينما ينتهي الزواج بالوفاة الطبيعية أو الانفصال في المجتمعات الحديثة، ينتهي الزواج في مصر نهايات درامية، حيث يقوم الزوج بطعن زوجته أثناء نومها أو تقوم هي بضربه بالساطور وتجميعه في أكياس بلاستيك ب ٣ جنيه

تخاريف سلفية

اللحية و ما أدراك ما اللحية ؟

فمن ذا الذي لا يعرفها؟ من هذا الغافل الجاهل الهالك الذي يعيش في دولة عربية اليوم دون أن يمر عليه حديث اللحية ..؟ شعر الحدود الذي يميز الرجل عن الأنثى والمتدين عن « اللهم احفظنا » والذكر عن « ولامؤاخذة » وربما بين المؤمن و « عندك اعتراض »؟

كل هذا وأكثر يعرفه الناس في بلادنا جميعاً وهذا المقال ليس تطاولاً على قدس الأقداس ولا توبيخاً لمن اختصروا رسالة الإسلام في شعيرات تترك وشعيرات تقص . هذه السطور الحلوة دي في اتجاه آخر وهو الاتجاه الذي أشرت إليه سالفاً في عنوان المقال . نعم ! علم اجتماع اللحية

هذه سطور لا أظن أن أحداً منكرها فقد صارت اللحية بما تشكله من علامة مميزة لصاحبها لا سيما إذا واكبها استحضار بقية الطقوس الشكلية من إسبال للإزاز و اصطحاب ظاهر من أعلي الجيب لمصحف وبقواره يقف رجل ويا حبذا لو كان الأخ يرتدي الجلباب الذي يدعي إسلامياً « لطالما سألت نفسي ماذا كان يرتدي أبو لهب »

وإذا كنا بالأمس القريب نتحدث عن عنصري الأمة « مسلمون وأقباط » ونزعم أن ما يجمعهما من عادات وتقاليد لاختلاف العقائد وربما لاختلاف المزاج النفسي الذي تصوغ جزءاً منه عقيدة الإنسان ..

أقول إذا كنا نزع ذلك حقاً فلنا اليوم أن نقرر دون شك أن بيننا من يحيون بثقافة مختلفة في كل ما سبق ومشاعر تجاه الآخرين مختلفة وعلاقة متوترة بكل ما يحيط بهم. ربما فاقت في توترها غير المعلن « مؤقَّتاً » تلك الخلافات التي تظهر بين الحين والآخر وتصنف بالطائفية ..

هذا الانفصال الذي يرى أصحاب اللحي أنه من سبل الخلاص في الدنيا والآخرة لا يظهر فقط فيما يخصهم من ممارسات يؤدونها مع أنفسهم ومع ذويهم بل يتخطى ذلك إلى أخلاقيات غريبة على مجتمع عاشت فيه الديانات الثلاث يوماً دون أن دفته الإنسانية .

في المشروع أو الميكروباص بس باللهجة الإسكندرانية أو في المواصلات ذلك العذاب اليومي في مصر ذهاباً وإياباً إلى العمل أو المدارس و الجامعات تعودنا أن يقوم القوي منا للضعيف ويجلسه مكانه يقوم الرجال للنساء ويقوم الشباب للرجال و النساء علي السواء بل وربما تتخلي امرأة متوسطة العمر عن مقعدها لعجوز لا يقوى على الوقوف

إذا كانت أقرب الجالسات إليه. كل هذا وغيره كان يحدث دون تفريق بين مسلم و مسيحي أو بين رجل و امرأة. كان المعيار دائماً هو القدرة من عدمها. من استطاع أن يقف ولو تحامل علي نفسه قليلاً قام لمن لا يستطيع. أيًا ما كان. أما الآن فقد استطاعت الفئة الثالثة أن تفرض قيمًا جديدة علي أغلب الركاب يمكنك؛ الآن أن تصعد المترو مثلاً لتجد شبابًا كأبواب القاهرة الفاطمية يجلسون بمنتهي البجاجة بينما تقف امرأة تخطت الخمسين تنزف إرهابًا و عرقًا وتحمل في يديها أكياس تكاد تتوسل لمن كان له قلب أن يتعاطف ويقوم، وما من مجيب؛ هذا لأنها ببساطة غير مسلمة وربما مسلمة، ولكنها غير محجبة وربما محجبة لكنها غير ملتزمة بالحجاب الشرعي علي أتم شروطه ..

وربما كانت كما يظنون لكنها غير منقبة! عارية الوجه والكفين والعياذ بالله فهي امرأة لا تتمتع بحياء الصالحات. وربما كانت القسوة لسبب آخر غير الدين والملبس فهي امرأة يبدو عليها أنها عاملة؛ إذن فهي تؤمن بهذه المساواة إذن؟ في الميكروباصات لا سيما الصغيرة يصعب الأمر ويتعقد أكثر في الصباح حيث تندفع جموع الناس صوب الميكروباص في أي موقف. ربما قبل أن يقف يكون قد امتلأ، يدخل الكل في تدافع وصرع شديد من لحق الكرسي فقد فاز ولحق بعمله وفي هذا الصراع غالبًا ما يفوز الشباب بينما تفاضل الفتيات بين انتظار ميكروباص آخر « موت

يا حمار « مع احتمال تكرر المأساة مرة أخرى بل ومرات أو أن يقفن في حيز ضيق في الميكروباص لحين نزول الركاب. ولأن الميكروباص في مصر يلزمه منادٍ فإن نصف هذا الحيز تقريبًا تشغله يد المنادي وقدميه وصوته الأجهش رغم امتلاء سيارته منادياً علي مزيد من الركاب ..

لم يكن أمامي والحال كذلك إلا أن أقف لأجلس إحداهن مكاني بعد أن كاد المنادي يفترسها بحجة ضيق المكان. كنا في شهر رمضان أغلقت المصحف و قمت عارضاً عليها الكرسي قبلت علي الفور، لكن لم تستطع أن تخفي دهشة واضحة، فكرت لدقائق لم كل هذه الدهشة فالمسألة بسيطة و بديهية ثم شغلني مكاني الجديد في الميكروباص عن ذلك كله وبينما أتخبط يميناً ويساراً جاءت محطتها فشكرتني بامتنان شديد ونزلت. عدت إلي الكرسي الذي يجاورني فيه شاب من وجهاء حارتنا، والذي طالما ابتسمت له وابتسم لي في هدوء وتبادلنا التحيات و الطيبات وليس بيننا غير ذلك وجدته يميل علي قائلاً في تأفف يا أخي عندما تريد أن تقف قف لأحد يستحق هذه متبرجة. نظرت إليه بنفس الدهشة التي كانت تملأ وجه الفتاة التي أجلسها مكاني وأكملت القراءة ..

سلسلة المضحكات المبكيات لا تنتهي في مواصلات مصر المحروسة عند قسوة الملتهجي علي من هم أدني ديناً وخلقاً كما يتصور، لكننا تجاوزها إلى تعذيب الركاب جميعاً المرضي عنهم -وما أندرهم- والمغضوب عليهم

والضالين علي السواء حيث أن أختنا متي جلس وفتح المصحف لبسته روح فريد شوقي في فيلم بداية و نهاية حينما صمم أن يغني ويحيي فرح صلاح منصور « طب والله زمان زمان والله » وحيث أن الغناء حرام شرعًا كما يعتقد القرآن الكريم هو البديل !! فعلى الركاب ربط الأحزمة والاستماع إلي تلاوة مباركة، ومن تسول له نفسه أن يطالبه بخفض الصوت فهو ذلك الذي يرفض أن يستمع إلى كلام الله .

وخذ عندك بقي يا أختنا باذاكر و مركز راجع من شغلي مش شايف قدامي أرجوك ، .. مسيحي ولا يعنيني كثيرًا أن أسمع ما تقول، .. صوتك يا بني وحش قوي والرسول يقول زينوا القرآن بأصواتكم يا أختنا اقرأ في شرك المسألة خشوع وتدبر مش صوت عالي وخلص، وآخر موضه القرآن المسجل علي الموبايل وأحيانًا الخطب الزاعقة وحيث أن المسيحيين أيضا يمتلكون الموبايلات وبعضهم لا يفتقد إلى الجرأة الكافية « فالتعصب هو الآخر صار آخر موضه » والمبرر المنطقي أيضًا اشمعي انتم ؟

قد تتحول بعض عربات المترو الترام أو المترو أثناء اليوم إلى القمر الأوربي أو عرب سات بعد أن تداخلت قنواته الدينية مع بعضها البعض علي موجة واحدة... قرآن وترانيم.. وأنت تعلي الصوت وأنا

أعلي الصوت ويا سلام لو حته عيل علي صدر أمه عايز يرضع لامؤاخذة
يعني وهي مكسوفة ترضعه قدام الناس وهو يعترض بكل قوته بكاء
وصراخ وبس يا واد و تعالي يا بت وصوت العجمي وترانيم الكنيسة
وصوت احتكاك الترام أو المترو بالقضبان والهواء الملوث بالرصاص
تحت الارض. و أهو مبروم علي مبروم مايرولش .. بس كدا ..

الراجل مظلوم طول عمره

البت مش ملزمة تجهز نفسها. أبوها أو البيه خطيبها هم اللي هايدفعوا دم قلبهم، العريس علشان يتجوز عايز شبكة ومهر وشقة و عربية وأدوات كهربية ووظيفة جامدة ويعمل فرح ويحجب هدايا طول فترة الخطوبة وإلا يبقى بخيل. أما العروسة يا دوب تجهز الشقة بس! مفيش حد يبصص على بدلة العريس. كله يبصص على فستان العروسة لو واحدة عملت مخالفة و عيظت شوية للظابط هايعديها، لو راجل هاياخد علي دماغه، لو واحدة ما ادتش قرايها عيدية العيد مش هايقولو عليها بخيلة .. هايقولو أصل العيب على جوزها، لو واحدة تأخرت على المحاضرة ممكن الدكاترة يدخلوها، لو ولد هايقولو روح يا بابا كمل نوم برة في الشمس .

لو حصل زعل بين البنت و باباها مش هايطردها برة البيت .. وهي بس يادوب تعبط شوية وأبوها هايروح يصالحها على طول .. أما الولد ف يادوب يلحق مكان ينام فيه جنب البواب .

نيجي بقا لدلع البنات، البنت وهي عندها ٥ سنين يا عسولة و لو هي ١٢ سنة يا عروسة، لو ١٨ سنة يا قمر، لو ٤٠ سنة يا هاتم، ٥٠ سنة يا أم

العيال، ٦٠ سنة يا أم العيال، ويا سلام علي دلع الأولاد،.. ١٠ سنين إنت
ياد، ١٨ سنة إنت يا شحط بقيت طول البا، ٤٠ سنة يا راجل، ٥٠ سنة يا
حاج، ٦٠ سنة .. ياراجل يا عجوز مناخيرك أد الكوز....!

قوم يا مصري

قوم يا مصري طابور العيش بيناديك
قوم يا مصري شكلها راحت عليك
تقولو انشودة تقولو مارشات عسكرية

كل دا مايفرقش لأن الواقع تجاوز الحلم، صدقوني تجاوز كل شيء لما الناس تصحى من الفجر وتجري على الأفران والمخابز. و هي شايلة أقفاص العيش، والكراتين والجرايد .. وأقصي حلم لكل واحد بجنيه عيش ! تجاوز كل شيء لما يتحول طموح أكثر من ٨٠ مليون من التطور والريادة والتحضر والتدين على لقمة يحصلوا عليها وبدل ما كل واحد صاحي يفكر هيخترع أية ولا هيبتكر أية في شغله، ولا الرسالة اللي بيحملها هيوصلها ازاى لغيره يختزل دا كله في حلم رغييف العيش، وبعد كدا يستني حياته تتقدم ومستواه المعيشي يتحسن

إزاى وحياة أبوكم واحد يقولي إزاى دا يحصل وكل واحد سيطر عليه حلم رغييف العيش، الحلم اللي عجزت عشرات الحكومات من خمسين سنة علي تحقيقه، في الوقت اللي البهايم و الحمير ما عندهاش الحلم دا ماشفناهاش يوم واقفة في طوابير علشان العلف ولا البرسيم، عمومًا الحلم

المستحيل تحقيقه على مدار عقود والأراء اختلفت على أسباب عدم تحقيقه؛ في ناس تقول الحكومة بتعمد تجوع الشعب علشان تعرف تحكمه .

وفي ناس تانية بتقول أن الحلم أكبر من قدرتنا و أي محاولات لتحقيقه بتضيع بسبب الزيادة في السكان، وناس تالته بتقول امريكا ورا ضياع الحلم لان لو اتحقق تاني يوم هنفضلها هي و اسرائيل ونقعد نمخخ ازاى نمسح بيهم البلاط .

وناس ليها رأي مختلف وبتقول أبو علي حرامي الدقيق هو السبب ومعاه الست فوزية اللي بتأكل العيش للفراخ والعجول بتوعها، عموماً علشان المشكلة تتحل وما ننتظرش الحلم وقرن تاني يتحقق وانتمو عارفين احنا فين وبقية الدنيا فين .

العالم كله بيدار بالميكرو شيب و الميكرو بريسور وأنا بصراحة معرفش ايه دول بس احنا بندار بالميكرو باص، أولاً نخط علي جنب مسألة التخوين و العمالة؛ لأن دا أسوأ شئ لما الحاكم يسمع أن شعبه بيقول عليه كدا أو الحكومة تسمع أنها عاجزة عن حل المشكلة الاتنين بييجيب معاهم الكلام دا نتيجة عكسية ويقولوا طالما مش عاجبين الشعب يحل مشكلته بنفسه .

نمرة اتنين .. ليه مانفكرش كلنا وبصورة عقلانية كمرحلة نصلح شوال الدقيق المخروم اللي علي ما يوصل من برة للمواطن بيكون معظمه اتلهف ودا كمرحلة اولي لحد ما ناخذ خطوات جادة من الكل « شعب و حكومة » لحل المشكلة جذريًا، ونعتبر أن حل أزمة رغيف العيش هي مشروعنا القومي كبداية لمرحلة من التطور طبعًا بتقولوا يا عم الحاج ياللي قاعد تدينا مواعظ هندس الخرم ازاي؟ ومليون ومليون فار بيقترض في الشوال .

أقولك شوف يا أستاذ الأول لازم يتولد عند الجميع قناعة ويقين أن الحرامي لازم يأخذ بالجزمة فوق دماغه وأن مصلحة الجميع فوق مصلحة الفرد وأن مصر أكبر من أي واحد فينا ومهما الواحد علي اللي فيها سواء بالمال أو المنصب ومصر واطية لامؤاخذة يعني، أديك مثال علشان تصدق !

مصر فيها ١٢٥ ملياردير و ٢٥٠ ألف مليونير و دي أرقام تقديرية صدرت عن مجلة فور بزنس والعدد دا أكبر من عدد أثرياء الوطن العربي مجتمعين وبرغم كدا وبدون نخجل أي واحد مصري يخرج برا مصر يعامل علي أنه رايج يشحت . مش رايج يخلي الآخرين يشوفوا خبرته وعلمه اقتنعت ياعم الحاج ؟ .. لو لأ أديك مثال تاني ..

طيب إزاي نواجه الفيран دي بالسم. ولا نكون أذكياء ونستفيد من العلم و التطور والتكنولوجيا .. أعتقد الحل الثاني حلو ومافيهوش دم كل واحد يشوف محبز أو مقتش تموين أو واحد من الفيран يصوره ويفضح أهله في يوتيوب أو المواقع المصرية، ويقدم بلاغ بالسي دي في القسم وياريت البرامج المصرية تفتح الباب لعرض هذه الفضاء وأن كل حرامي دقيق من هنا ورايح يعرف أن مليون كاميرا هتراقبه !

وأنا واثق من أن الرئيس باقولها و أؤكد عليها الرئيس محمد مرسي مبارك أمله زينا بالظبط يستريح من مشكلة رغيغ العيش، والراجل مش هينزل الطواير علشان يدي كل واحد بجنيه عيش .

ولو حس أن الناس هتعالج الموضوع بدافع وطني مش علشان تصفي حسابات، هياخد كل الاقتراحات بعين الاعتبار، وردو علشان نكون عادلين أن الآوان قبل ما ندبح بتوع التموين نديهم حقهم علشان يبطلوا الرشوة ويعرفوا يعيشوا وماحدش يضحك عليهم بعشرة جنيه و عشر ترغفة .

وأعتقد أن إعطائهم نسبة كبيرة أو معقولة من الغرامات اللي يضبطوها هتكون حافز كويس. ولو نجحوا في أن الأمور تكون صحيحة أعتقد أن وزارة التضامن هتوفر مليارات .

آخر حاجة علشان عارف إنكم مليتوا وزهقتوا وكدا يعني، لو فضلنا كل واحد بي فكر في نفسه وبي فكر أن يعيش بدون ما يراعى أنه جزء من مجتمع، وأن المجتمع بي فرض عليه تضحيات علشان غيره يعرف يعيش يبقي الشخص دا غبي وأقرب وقت هي خسر كل شيء؛ لأن نار الحقد ونار الجوع هتحرقه وتوصل للي كسبه على حساب دموع الآخرين
معلش علشان طولت عليكم بس كدا ..

قناة مزيك و فوزيرها

زهقانة .. قرفانة جدًا .. الساعة دلوقتي اتنين و ربع قرب الفجر كذا
فتحت البنت التلفزيون .. لقيت برنامج مسابقات وشاب كول لابس
لبس دكتور، والسؤال المعروف ع الشاشة « فصل بس مفهوش تلامذة
.. يبقي ايه؟؟ يلا يا شباب يبقي أيه؟ اتصلوا دلوقتي الجائزة جامدة جدًا
٢٥٠٠٠ جنيه

تتصل بنت من مصر وتكلم المذيع باللهجة السورية وبالمناسبة المذيع
اسمه كريم .

البنت : بمنتهى المياصة اللي علي وجه الأرض .

كيموو

كريم : قلبي .. إزيك ؟

البنت : انت عارف أنا مين ؟

كريم : وحد بس يتوه عنك عارفك طبعا انتي فلانة ..

البنت تضحك ضحكة رقيقة

كريم : ها عرفتي إجابة السؤال ؟

البنت : أه .. تضحك بس مش هقولك .. تضحك

كريم : ليه بس ؟ وحياتي قولي

البت ماشي يا كيمو عشانك انت بس .. تضحك

كريم : هه ؟

البت : فصل الشاحن .. وتضحك

كريم : هاهاها والله إجابة مقنعة بس للأسف تخسري

البت بمياصة متناهية : لأ طبعاً مش هخسر طالما سمعت صوتك

يبقي أكيد هكسب

كريم : هو انتي سورية بجد ؟ ولا بتضحكي عليا

البت تضحك ضحكة رقيقة جداً : ليه بس بتقول كدا ؟ أنا سورية

أباً عن جد .

كريم : هنتكلم في الموضوع ده بعدين .

البت : بالاي

كريم : باي يا قمر

والنبي أيه دا ؟ بالله عليكم أيه دا ؟ وبعدين هيكلمها بعدين امتي ؟ هو

ظبط خلاص ولا أيه ؟ .. الإسفاف وصل للدرجادي استهانة رهيبية

بعقول الناس اللي بتتفرج زي مانكون جهلة أو متخلفين، وبعدين هو

كريم دا بيذيع برنامج ولا جي يظبط ! ... ” نصيحة ”

بدل ما تتفرجي أو تتفرج علي مزيكاً، اتفرج علي قناة الجزيرة ولا

العربية علشان أعصابك ... هو الانسان عبارة عن أيه غير شوية

أعصاب !..

المؤسسة التعليمية

نفسى أفهم ..

ليه كل المدرسين يقولونا .. « احنا هنا اسمنا وزارة التربية و التعليم ..
.. علشان كدة التربية لازم تبقى قبل التعليم .. » .. والله فاهمين كده ..
بس هل انتوا شايفين أن فيه تربية .. أو تعليم ؟!

تربية ازاي لما يبقى شعار كل طالب « الصياغة أدب مش هزكتاف »
وبدل ما يبجي كل يوم المدرسة بالمسطرة والبراية .. يبجي بالموس والمطواة
! .. وإزاي يبقى تربية لما يكون الطالب شايف كل المدرسين بتوعه وهما
بيشتموا ويضربوا ولا على بالهم .. إزاي حيتربى كده ؟ . وإزاي يبقى في
تربية لما يشيلوا حصة القيم والأخلاق لما الطالب يعدي مرحلة الابتدائية
؟ ! يعني السنتين اللي أخذ فيهم حصص قيم وأخلاق دول كفاية ؟!

وبعدين فين التعليم ؟! .. فين التعليم لما يكون المدرس عزيز من الطالب
يحفظ الجدول الدوري كله في أقل من أسبوع .. ده أنا أتحدى إذا كان
أينشتاين حفظه في شهر واحد ! .. وفين التعليم لما يكون النظام بالحفظ
مش بالفهم .. يكرس كل طالب المعلومات اللي عنده في محه وبعدين
أول ما تخلص الامتحانات يفرغها على دُفعة واحدة !

وفين التعليم .. وفين التربية .. وفين التعليم .. وفين التربية؟! ..
مفيش لا تربية ولا تعليم .. ممكن تقول لي ليه كل العضاء مكنوش في
مدارس وهما صغيرين؟! .. سواء كانوا عضاء مصريين أو غير مصريين
.. علشان هما عارفين أن المدرسة بتكبت المواهب والقدرات .. إن
مكنش ده بيحصل في امريكا وانجلترا .. فهوا بيحصل عندنا هنا بكل
تأكيد .. إن المدرسة وسيلة لعقاب الطفل ..

وبعدين إيه حكاية الثانوية العامة وعنق الزجاجة دي؟! الثانوية
العامة بقى ليها مصطلحات كتير كلها ترعب أكثر من بعضها .. طب
ليه كده؟! .. ليه تخلوا مستقبل الواحد فينا معتمد على سنتين تافهين
ملهومش لازمة ولا قيمة .. وكل ما علينا فيهم إن احنا ندخل أكبر قدر
ممكن من المعلومات في دماغنا؟! .. وليه الرعب اللي احنا فيه ده؟! ..

وليه وليه وليه .. والموضوع ما زال غير مكتمل .. وما زال مش
معروف له حل .. وما زالت القضية مفتوحة .. وأنا مش قادر أكتب
أكثر من كده لإن في حاجة غريبة كده موقفة مسرى الأفكار اللي في
دماغي .. تقريبًا .. أصبحنا في حالة حيث الطالب أصبح متشائم نفسيًا

الشريعة يا بلاش واحدة غيرها متنفعناش

عندنا النهاردة يا جماعة موضوع رهيب رهيب لازم كلنا نأخذ بالناس منه ألا وهو الشريعة. الشريعة دى أيه بقى دى يعنى لازم بصراحة نقول سبحان الله حاجة رهيبة والله. وهى كائن قريب للقلوب بعيد عن العقول ويوجد بها ثغرات بتخرج وتعمل صوت غريب (الذرة) ملقتش أرقى من كذا أكتبه و يسمي بالداعى المتاسلم (اقتباس د. مصطفى محمود من برنامج العلم والإيمان)..

احنا عندنا مشكلة فى مجتمعنا أن الشريعة هيا الى بتنتخب الرئيس، وهيا الى بتشيله، وهيا الى بتكفر، وهيا الى بتامن، وهيا الى بتبنى مستقبلك، وهيا الى بتقضى على الفساد، أنا معنديش اى اعتراض على الشريعة أو تطبيقها أنا اعتراضى على معدين الإسلام المتاسلمين؛ لأن الواحد لما بيسمعهم بيحس انو لو كان ماجوسى كانت هتبقى الحياة أحسن. احنا ديننا أحسن من كل دا، احنا الدين الوسطى دين اليسر والسماحة مش دين السب والقذف والإشهار. أنا مؤمن بالله عز وجل ورسله وكتبه وملائكته والقدر خيره وشره ومتيقن من أن المسلم هوا من سلم الناس من لسانه ويده فهؤلاء ليسو بمسلمين؛ لأنه الناس لاتسلم

من لسانهم أو يديهم أو رجلهم حتى فهؤلاء الذين يدعون الإسلام لا يمثلونى ولا يمثلو دينى أو ملتى. فكيف من يأتى من يدعون الإسلام بصور فاضحة لفنانة أنا كانت كذلك او لا. أليس ذلك تشهير وتراشق بالعيبيات، واعتبار أن كل من يعارضهم كافر وملحد وعلمانى وليبرالى و(مسيحى). ويريد أن أمه وأخته ينزلو عريانيين في الشارع أليس ذلك محرم شرعًا. فكيف حصل هؤلاء الشخوخ على لقب شيوخ هل أصبحنا في عصر نجامل فيه بعضنا البعض بلقب شيخ أو داعى لكل من هب ودب، أو من حفظ سورة الفاتحة فهو شيخ. اذن أعلن من اليوم ظهور الشيخ مصطفى عامر الأزهرى(عشان الغلابة والمتقفين يايديوك)أو البخارى(كدا كدا هيأيديوك) وظهورى الأول على قناة التت (اتقفلت يا خسارة) لنصرة الشريعة الإسلامية ...

عطلنى شكرًا

ما أحلى من النوم في السرير بدون أي مشاكل . لا تقولى بقا انزل دور على شغل ولا بتاع . عشان لو صحيت مش هلاقى مية أغسل وشى ولو لقيت مش هلاقى كهرة أشغل الماتور؛ دحنا ساكنين في التانى وشغالين ماتور ١ حسان . ولو لقيت مش هلاقى هدوم نضيفه ألبسها ألاقى ازاي وأنا أمى بتغسل يوم كل أسبوعين لخمس أفراد وبتشغل الباقى عشان تساعد أبويا وأفرض انى لاقيت .. مفيش حاجة بعيدة عن ربنا . أبويا هيديني فلوس منين ؟ عشان انزل دي اللحمه ماشفنهاش من أيام الفتح الإسلامى لمصر وياعم بردك أبويا راجل طيب وادانى جوز جنيهات، افرض انى نزلت من البيت تفكر ببقا أهلك « مش حضرتك طبعًا » يعنى تفكر إنى ممكن ألاقى مواصلات ولو لاقيت هلاقى مكان ؟ ولا هاتشعبط في الأتوبيس وافرض انى اتشعبط .. تفكر انى مش هتسرق ؟

وياسيدي هفضل معاك للآخر ومش هتسرق وهفرض انى هنزل عند مقر أي شركة محترمة تفكر هيدخلوني ؟ ولو دخلت هلاقى وظيفة ؟ ولو لاقيت تفكر مش هتحصل مشكلة ؟ و مفيش واسطة هتطيرني ؟ حتي لو كانت شغلتي مجلاتي في جراج الحاج سيد اللي آخر عربية ركنت

فيه من أيام محمد علي وكانت بوليس وجاية تقبض عليه. وياعم ماشي .. مفيش واسطة تطيرني ولا حاجة .. تفتكر ان صاحب الشغل مش هيبهدلني على الفاضي والمليان .. اقلك حاجة ياعم ماشي خلاص مش هتحصل حاجة وحشة ... هسألك سؤال ..

لو انت خريج هندسة أو طب او زي حالاتي تجارة هترضى تشتغل كده بصراحة ... اه هرضى .. ولا أمى واخواتي يجوعوا أصل في بلدنا في سياسة عطلنى أعطلك ظبطنى أعطلك بردك. فلو تخرجت دا لو اتخرجت مش هتلاقى شغل وتتعتل إنما طبعًا يا عين الحاجة لو معاك واسطة تعمل الى انتا عايزه، لكن أنا أجيب واسطة منين. وأنا اكبر واحد في عليتنا أمين شرطة يعنى لو اشتغلت هحرس كلب في بيت لاجئ سياسى .. طب أعمل أيه. طيب بص بصفة عامة أنا دلوقتى هرجع أنام لا تقولى بقا شغل ولا نيلة كفاية تعطيل لحد كدا عشان عندى حام مستنيني، بفكر أكون فيه عندى ميكروباص بتاعى مش شغال عليه أو عندى عدة فراشة مثلاً. يا لهوى دنا أكسب جامد أوى يلا يلا كفاية تعطيل مش عايز أعاملكم بسياسة الدولة

شاهد عَيَان

الظابط : تعالا يا روح .

مصري : نعم يا باشا .

الظابط : أيه الحشيش اللي في ايدك دا .

مصري : حشيش أيه يا بيه دي حبوب علاج .

الظابط : أيه بدرة ؟ طب وحياة امك ما هسيك .

مصري : يا باشا بدرة و حشيش أيه, أنا بقلك دا علاجي .. اهي

الروشته لو مش مصدقني .

الظابط : بترشي الظابط يا كلب دا انت وقعتك سودا،

كالعادة ضرب بدون سبب و إهانة ع الفاضي وتسلط ظابط ميعرفش

انو المفروض يحمى مش يعرض الناس للخطر .

أمام النيابة : يا بيه أبوس إيدك، والله انا كنت ماشى فى حالى

مسكنى الظابط وقللى ايه اللي معاك دا قوتله قوتله دا علاجى يا بيه،

والله انا مريض وكل الضرب دا من الظابط واتنين مخبرين معاه مسكونى

ووظلعو عين أهلى والله يا بيه من غير معمال حاجة .

النيابة : طب فين الدوا

مصري : يا باشا ما الدوا وقع من إيدى لما الظابط شده ورماه .

ألف نيلة ونيلة

النيابة: خلاص خلاص مش نقاصة تسول خليك عندك شوية .
مصرى : يا بيه أبوس إيدك والله ماعملت حاجة . والله أمى ست
كبيرة وعيانة ولو غبت عنها يوم ممكن يحصلها حاجة .
النيابة : اسكت يا بنى مش فتحنها ملجأ .

كالعادة النيابة تقرر حبسه أربعة أيام على ذمة التحقيق . وبعدين
يلبس قضية عنب على مقاسه أو أزيد درجة (اصل الداخلية بتفكر
للمستقبل) وبعدها يتقدم لمحاكمة عادلة من طراز خاص .

الحاجب : محكمة... القضية رقم ٥٦٧٣٤ لعام ٢٠١٣ جنايات

القاضى : أيه رد الدفاع .

مصرى : يا باشا أنا دفاعى ربنا وبعدين أنا معيش فلوش أوكل
محامى

القاضى : وازاى النيابة متعينلكش محامى .

النيابة : دعنا سيدى القاضى نتغاضى عن هذه التراهاات فهى ليست
بالأزمة.

القاضى : ماشى نادى على الشهود .

الحاجب : الشاهد الأول.. فرحان متفائل منصور

فرحان : يا باشا مصرى أنا أعرفه من ٣ سنين . لكن حاسس انى

أعرفه من زمان أوى دا كان صاحبي في الميدان وأخوه مات ووالده اتشل انتو المفروض تكرموه مش تسجنوه يا باشا مصرى اتصاب في عنيه في ٢٨ يناير وفي عينه الثانية في ١٩ ديسمبر ٢٠١١. ومتصاب بالخرطوش في جسمه في ٢٣ ديسمبر ٢٠١٢. واضرب واتعدم العافية في اعتصامات التحرير و كان بيشم غاز أكثر ماشم هوا طول حياته واتسحل على ايد المتأسلمين على إنه فلول وكلب وخاين وعميل واتصاب في اعتصامات الاتحادية. واضرب يوم الاستفتاء عشان قال كلمة حق يا سيدى القاضى دا بقاله ٣٠ سنة واكل على قفاه وساكت. ولما اكلم محمش على قفاه بس دا خد على كل حطة في جسمه وبدون سبب باسم الحرية .

مصرى : يا باشا أنا استويت من ظلمى ومن ظلم بلدى استويت وبالذل أنا حسيت افكرتونى نسيت. لأ دنا صحيت يا بيه أنا كل حطة في جسمى تاريخ وكل حطة في بدنى ضريح ومدفن لايدى وكفن لرجلى. لو ناوى تظلمنى اظلم بس متنساش تروح تصلى في الجامع أو الكنيسة وتتطلع تقول أنا صليت .

القاضى : يا بنى احنا مبنظامش حد اتنا أيه دليلك على أنك كنت بتشتري دوا

مصرى : الروشنة اهيه يا بيه

ألف نيلة ونيلة

القاضى : بترشى قاضى يا كلب حكمت المحكمة حضورياً بتحويل
أوراق مصرى إلى مفتى الديار المصرية لعدم التاكّد من جنسية الدكتور
المعالج إن كانت مصرية أو امريكية .

كراكيب

ساكسونيا... ساكسونيا يمكن تكون أشهر كلمة معلمة في عقول المصريين من زمان أوى وهيا الكراكيب؛ لأن كل واحد فينا في كراكيب في حياته وفي عقله وفي بيته وفي أصحابه وكل منمشى في حتة هنلاقي كراكيب.

بس ثانية واحدة ليه قولنا عليها كراكيب يمكن عشان حاجات بايظة يمكن خلاص مش محتجها. بس تفتكر زى ما في حد ييام الكراكيب من البيوت هنلاقي حد ييام كراكيب العقول. كل واحد فينا في عقله كراكيب كتيرة أوى يا ترى هبقي في المستقبل أيه؟

سيها علي الله يا عم، و علي مصحح الثانوية العامة. انت هتقطع نفسك يا تري هاتجوز؟ ولا لا يا عم بردو سيها علي الله، وعلي وزارة القوي العاملة .. و يا تري هجيب ولدو لا بنت؟ .. لا دي ماتسهاش بئا في سونار و أجهزة حديثة .. و يا تري مين بيتكلم عليا من ورا ضهري؟ .. يا عم فكك دا لو كان بيحبك بجد و خايف عليك كان جه قالك في وشك عيبك بس هو خايف منك ..

يا تري هيتقي معايا فلوس ؟ ياسيدي دي مابقتش تفرق احنا بعد كدا
هنتعامل بالمقايسة « اصل البلد بتفلس خلاص »

و يا تري هعيش لحد امتي ؟ دا علم غيب يا بيه ملناش نتكلم فيه.
الخلاصة ان الواحد لو رمي كل همومه علي جنب هيعيش حياته و
يستمتع بيها .

اركن كل كراكيبك علي جنب وعيش حياتك ماتهتمش بالمستقبل
أكثر ما انت مهتم بالحاضر ..

ماتستبعدش حاجة تحصلك لأن ربنا قادر علي كل شئ .. خليك
متفائل و اوعي كراكيبك تنسيك دنيتك و حياتك و اوعي تستسلم
لليأس و فكر ازاي كراكيبك تصلحها و تشغلها تاني . ممكن تكون منفعتها
أحسن من ضررها بس انت اتوكل علي الله واعمل اللي عليك و سيب
الباقى علي ربنا ..

كرسي في الكلوب

كل واحد فينا دائماً يبص للمستقبل بنظرة معينة بتختلف من واحد للثاني .. فينا اللي عايز يطلع ظابط و فينا اللي عايز يطلع حرامي و اللي عايز يكون مهندس و اللي عايز يطلع صحفي زي حالاتي .. وفي اللي نفسه يكون سواق .. و في اللي ظروفه بتخليه يشتغل سواق .. لكن مهما كان تخيلك عدد قليل اووي اللي بيفكر يكون رئيس .. و في اللي ظروفه بتخليه يكون رئيس .. زي حالتنا كدا المهم دلوقتي مش ان هو كسب ازاي ! ولا أيه مشروعه .. المهم الكرسي ثم الكرسي ثم اللي جاب أم الكرسي .. عارف الطفل لما يشوف لعبة ويحبها أوي ، يبشبط فيها ولو اتاخذت منه يفضل يعيط ويرعل اوي اهو هو دا حال رئيسنا « مش قصدي طبعاً في (العياط) انما في تمسكه بالكرسي »

أصله فأكره لعبة يعمل اللي هو عايزه بيها ماهي ملكه .. مش فاهم أن هو مجرد موظف وله حقوق. وعليه واجبات .. وماينفعش يطالب بحقوقه إلا إذا كان يؤدي واجباته و أعتقد أن الناس مش شايقة أي حاجة تحققت غير ظلم و فساد تاني ونفس ردود و معاملة النظام القديم. وأيضا دم المصري رخيص .. و طول ما دم المصري رخيص يسقط يسقط اي رئيس .

ألف نيلة ونيلة

أياً كان تابع لمن المهم عند الشعب أنه يلاقي الأمن و الأمان و يلاقي
لقمة عيش يأكلها. لكن الحكومة مش مديّة فرصة و متمسكة بالحكم
لأقصى درجة من غير ما تعمل أي حاجة .

خلي الشعب يتمسك بيها هي أو يحبها مش فاهمين ! ان الشعب
يقدر يشيل الكرسي من تحت اي حد ايأ كان ..

مبيضة

المواصلات العامة « ميكروباص - توك توك - تاكسي - اوتوبيس الشعب » تعتبر هي أهم وسيلة للعيشة في مصر اتخيل في يوم تصحي ما تلاقيش مواصلات هتعمل أيه ؟ .. هتقضيها موتورجل ؟ « المشي مفيد للصحة » بس أكيد مش هتطير

اتخيل معايا كدا لو المواصلات تبطل تشغل مهرجانات و تجبر كل الناس أنها تسمعها.. بعيدة أوي دي صح ؟ بس علي فكرة في حملة في اسكندرية اسمها « لو شغلت مهرجان مش هدفع الأجرة » و الحملة دي فعالة في اسكندرية من سنتين بس محدش بيتجاوب معاها تمامًا لأن نص الشعب المصري بئا سرسبي والنص الثاني هما السواقين. مع أننا عندنا زيادة رهيبه في عدد المواصلات ويكفي الشعب المصري كله. لكن بردو في أزمة في الزحمة لا تقولي بئا عشان كباري ولا أنفاق ولا بتاع .. المشكلة في السياسة العامة للدولة و لوزارة النقل لأنها مش مقننة موضوع المواصلات .. غير الأوتوبيسات و في بعض المواقف .. و أنا صغير كان عندي فكرة كنت حابها أوي كنت بفكر أن المواصلات ووزارة النقل هي اللي تشرف عليها و يبقي الدخل للسواق زي ماهو. بس يبقي له وجهة معينة و طريق واحد مارحش غيره، و تكون الأجرة

موحدة زي الأوتوبيسات و كدا كل السواقين هيكون معاهم رخص و مش ماشيين بلطجة. والمواقف يبغي فيها موظفون حكوميون هما اللي يشرفوا عليها تحت إدارة السواقين للمكان؛ لأن هما أدري بالمكان و طبيعة الشغل. كدا أنت ممكن تحل مشاكل كتير جدًا مثل المشاكل و الخناقات اللي بتحصل بين الناس و بعضها علي المواصلات و زيادة الأجرة من عربية ل عربية .

مايقاش في زحمة لأنها هتكون بمواعيد و خطة زمنية محددة و بكدا تقدر تقضي علي الفوضىّة الخلاقة اللي بتحدثها المواقف الخاصة بالذات في المناطق الشعبية بس زي ما قلت هي مجرد فكرة أو بالاصح حلم أو كابوس بالنسبة للدولة و الحكومة .
لأن هما ماشيين بنظام « عطلني شكرًا » .

واخذها دراع

وأنا صغير كانت أكثر حاجة بحلم بيها أني أقدر أضرب أي حد وأبقي جامد جدًّا و أبلطج على الناس و أمسك سلاح والناس تخاف مني، بس لما بشوف اللي بيحصل دلوقتي بقول « اللهم احفظنا » ..
ظاهرة البلطجة تفشت في كل مكان في المدارس بجميع مراحلها و الجامعات، و المصالح الحكومية والشوارع .. كله واخذها بدراعه وعشان تبقي راجل لازم يبقي معاك سلاح و لازم « تزفوه » عشان تبقي راجل ولازم تتعارك كل يوم ولو اتضربت تجيب أهل حتتك كلهم، وتعلم علي اللي عاملها معاك و أبسط حاجة أنك تقتل واحد أو تعوره عشان الفلوس.

وأسهل حاجة أنك تتعرض لبنت في الشارع عشان دماغك عالية و الصنف عاجبك. بس احنا ماينفعلش نمسك في الأشخاص دي و نقول عليهم مجرمين و خلاص .. دول اسمهم ضحايا « مجتمع فاشي » لازم نلاقي السبب الحقيقي لـ تفشي الظاهرة دي .

تفتكروا عدم التربية في البيت ولا عدم الاهتمام في المدرسة ولا انتشار العشوائيات ولا عدم اهتمام الدولة ولا عدم توافر لقمة العيش

ولا أيه ولا أيه ولا أيه الخ.... مهما كتبنا مش هيكفي لأن مفيش سبب واحد للظاهرة دي دول ملايين الأسباب بيبتدوا من أن مفيش حكومة ترعي و توعي و تنمي .. و تتوسط بالبيت و انعدام الرقابة لقلة الرباية و تنتهي بتفكير الشخص نفسه ؛ فالبلطجة هي حالة أو فترة في عمر الإنسان لما يحس أن محدش يقدر عليه وأن كل الناس بتخاف منه و تعمله ألف حساب .

ولكل منطقة كبيرها اللي بياخد من الناس « اتاوة » و عايش بلطجة حتي في المدارس كل مدرسة فيها « شلة » دي الكبار بتوعها محدش يقدر يقولهم لا .

بس المشكلة الرئيسية أن مفيش حكومة تسيطر علي الوضع .. يعني حتي قنوها خلو البلطجي ياخد مرتب شهري علي عماليه الإجرامية و لو قتل أو تحرش أكثر يأخذ علاوة. و نعملهم مواقف و نمنع العمل الخاص ليهم بدل ما هما متشحطتين .. دول ثروة قومية ماينفعش نفرط فيها لأن دول لو اتحطوا في وش الأعداء هيصدوا بقلب جامدو هيجموا مصر « دا لو مصر لسة فيها رجالة »

.. مش في مكانه، قلبك مش قلبه ولا عينك هي عينه .

هو اللي حس وأنت اللي حكمت
هو اللي عاش وأنت اللي تعايشت
هو اللي ترجم مشاعره وأنت اللي ألفتها ..

الخلاصه من كل الكلام دا أنك لازم تتعود تخلي نفسك مكان
اللي حكي واللي كتب واللي بكى واللي شكى، وتفكر بطريقته هو مش
بطريقتك أنت .. واياك والتسرع أو أنك في يوم تظلم حد فكرياً لمجرد
أنك قرئت أفكاره بطريقتك أنت مش هو .

آه أي نعم احنا بنحس والي بيجري في عروقنا دم مش مايه ساقعه
بس الكلام دا بينطبق على المواقف المتكررة. ولما تكون أنت شايف
بعينك مش سامع ولا قاري بيها .. ! بس كده

نقد لاذع

ليه دايما الناس بتضحك على بعضها وتغش في مشاعرها وتزيّفها ليه
لما أنت مخنوق مني ماتجيش تقولي في وشي؟؟ .. هاتزعلني؟؟ طب مانا
هازعل أكثر لما اعرف أنك بتستكردي وتضحك عليا .. بتفهمني أنك
بتعزني ولا تحبني، وأنت مش طابق سمايا من أرضي .

ليه كل واحد مخنوق من صاحبه أو زهق من تصرفات صاحبه ولا
خطيبته مايروحش يقولها في وشها؟؟ طب مكسوف من المواجهة؟؟
مافي مليون طريقة أنك توصل إحساسك لى قدامك من غير ماتكسر
مشاعره زى لما يعرف أنك مستعبطه !

وماقتنّش نفسك أنك بتعمل كده عشان مش عاوز تجرحه لأنك
بأسلوبك ده أنت بتكسره مش بتجرحه وبس .. الجرح له دواء، لكن
كسرة النفس عمرها مابترجع تانى زى الأول حتى لو مثلت أنك لازقها ولا
حتى لاحمها .. مسيرها في يوم هتفك .

ليه كل الناس مابقتش صريحة مع نفسها قبل ماتكون صريحة مع
غيرها؟

كله بيضحك على كله

ليه أنت مابتحبش تعيش دور المظلوم ومع ذلك بتظلم غيرك !
وماتحبش يتضحك عليك وبتضحك على غيرك !

دا أنت حتى بتستمتع بتعذيب اللي حواليك وأنت شايف في عينهم
لهفهم عليك ومع ذلك كبريائك كتير أوى بيمنعك أنك تقولهم . بصراحة
أنك مليت أو تعبت أو على الأقل مشاعرك مابتقتش هي هي واتغيرت
واتحولت !

أنت لو اتغيرت هاتغيرني أنا كان
لما تكون كويس معايا أنا كان هابقي كويس مع غيري
في النهاية كلنا هنكون أحسن مع بعض
قلبنا على بعض .. بنحب بعض
حتى لو احنا بعيد .. حتى لو طريقنا غريب
يكفي أن قلوبنا على بعض ..
العقل و القلب
هما بس اللي بيحددوا مصير كل واحد فينا
وغالبا ما يرمي العقل غلطاته علي القلب

ألف نيلة ونيلة

والقلب كان يغلط أكثر لما يطمع وتكون قراراته فرديه من غير
مايستشير العقل

مسكين يحرام القلب دائماً راكب مرجيحة الغلط سواء من
تصرفاته وأنانيته أو من غلبه وطيبته المفردة اللي بتخلي العقل يركبه
ويعلق عليه شاعته .

العين واللسان

دائمًا العين بتوصل للي قدامها كل أحاسيسها الداخلية، لما بتفرح بتلمع ولما بتحزن بتطرد دموعها براها وغالبا مابتعمل كدا عشان توصل إحساس معين لحد قدامها سواء كان حزن أو فرح مع أنها ممكن تقوى وتتفق مع اللسان أنه يقوم بدور الحمام الزاجل هنا .

وأخليه هو يتكلم عنها يوصل الإحساس الصح بكل صراحه. لكن دائمًا اللسان ما يقوم بدور الرجل الثقيل الواعي الناضج اللي بيبيعي عارف وشايف كل حاجه قدامه صح، بس مايبتكلمش من باب التقل صنعة ودائمًا مورط العين معاه بسبب ثقله وعجرفته والعين دائمًا شايلاه ومحافظة عليه يمكن خوفها عليه أكثر من أنه يتكلم ويقول اللي ماينفعش يتقال وقت الجد والعكس .

أكثر علاقه ناجحه من وجهه نظري هي الودن والروح والعقل الودن هي اللي بتسمع كل حاجه حلوة أو وحشة وتروح زقاها في أنبوبة طويلة متفرعة على الروح وهو بيفرع للعقل والفرع الأساسي بيصب غالبًا في القلب .

والروح هي اللي بتحدد إذا كان الكلام دا واللهجة والنغم دا يوصل
للعقل ولا يتزق علي القلب، ويخلع هو يسببهم من تاني لأنانية العقل
وطيبة القلب .

من الآخر احنا بنلف في دواير مصمتة، الحدق بس هو اللي يعرف
يفك رموزها، ودا مالوش دعوة بالنضج من عدمه، عشان تفهم نفسك
محتاج تصاحبها عشان ماتقلبش عليك وتورطك في حاجات أنت مش
قدها .

عجائب الزمن

الأصدقاء .. هما فعلاً عجيبة من العجائب اللي يشوفهم وسط الدراسة هاتك يا حب في بعض وقرب وجدعنه أو وطينة على حسب الموقف. ويشوفوا بعض كل يوم أكثر ما يشوفوا نفسهم في المرايا. وكل يوم نفس السلام نفس الكلام نفس الحنين نفس الاشتياق، وخاصة البنات منهم بايتين في حضن بعض ويبسلموا على بعض كل يوم ولا ما يكون بقالمهم سنين متقابلوش .

هوب بقى يدخل في الموضوع بنت أو ولد يقلب الجنه لجحيم والحب لأنين ما بين النوع وخصمه. كله بيتحول وكله بيتلون ولو ماتغيروش دلوقتي الطموح بيحولهم على بعض بمجرد أنهم يتخرجوا تلاقى كل واحد ولا واحدة منهم انطوى وأخذ له جنب اللي بي أخذ جنب حرس ولا تخون .

واللي بيأخذ جنب خلصت حاجتي من عند جارتى، وأجدهم اللي بياخذ جنب دارى على شمعتك لحد ماتولع فيك، ودى من وجهة نظري بتزعل ناس كتير ياما من بعض، ويشيلوا وينفسنوا اللي يدارى على شغلانة حلوة واللي بيدارى على مزة. واللي بتدارى على عريسها الخفة

وتحرس أوي لحد ماتتخزوق منه، تلاقىها بتعلن تمردھا وتفضح نفسها
بغبائها، والولد بيغير من صاحبه اللي علق الحتة اللي عينه عليها، ويحقد
على شغلانة صاحبه اللي بتأكله الشهد، ويدوق هو المر ليلاتي بين
حيطان أوضته المشققة .

وكل واحد بيتحول ويتقلب على صاحبه وينسى كل اللي كان بينهم
من ذكرى حلوة، وتفضل جواهر السحنة المرة وأشباح الحقد والغيرة
لتصنع منهم أنصاف رجال على أشباه نساء تقعد في قرابيزنا بقية عمرنا
لمجرد أننا أصحابهم .. وياريته يطمر .

أفسد طفلك

العنف اللفظي يعني الشتيمة .. الاستهزاء .. العبارات السلبية المحبطة .. الزعيعيق اللى كثير من الآباء والمدرسين يمارسوه .. ده تأثيره لا يقل خطورة عن الضرب .. العنف اللفظي بيأثر على نفسية الطفل

أولاً: مش هيحترم نفسه، هيحس بدنية، مش هيبقى عنده ثقة فى نفسه لأنه هيصدق شتيمة لك فيه، لما تقوله أنت رخم وغلس، هيتردد أنه يتكلم مع الناس لأنه هيحس أنه لو اتكلم هيبقى رخم وغلس، فتكوين علاقات مع الآخرين هيبقى محدود... يعنى مش هيبقى اجتماعى .. أو بالفعل هيسوق الغلاسة والرخامة على الناس .. حتى لو هو مش رخم فالناس هي اللى هتبعد عنه، وقيس بقى على كل شتيمة أنت بتقولها للطفل

مثال: دلوقتى أنت لو جبت طفلين واحد قدراته محدودة والتانى قدراته كويسه، وجبت puzzle سهل، الطفل اللى قدراته محدودة البازل السهل هيبقى صعب بالنسبة له، لكن لو قولته: أنت قادر أنك تكون البازل، أنت عندك القدرة أنك تحله صح، أنت ذكى أنت شاطر... وكل الكلام اللذيذ ده، الطفل من جواه هيبقى مؤمن أنه قادر أنه يحل البازل

صح فعلاً هيحله صح ممكن يأخذ وقت كبير، لكن في الآخر هيحله صح. أنت كده نيمت قدراته البسيطة وحسنت مستواه ومع الاستمرار ممكن يبقى أحسن .

إنما الطفل التاني «اللى قدراته كويسة جدا» لو جبته نفس البازل «بالنسبة له البازل هيبتقى سهل لأن قدراته أحسن من الطفل التاني» وقولته أنت فاشل، أنت عمرك ما هتقدر تعمل نص البازل ده أصلاً، أنت مش هتعرف تعمل حاجة.

أنت كده نجحت أنك خليت الطفل مش عايز يحاول أصلاً، حتى لو فكر صح.. هيغلط نفسه.. ومش هيحاول أنه يجرب، أنت كده هزيت ثقته في نفسه، والموقف ده هيثبت في ذاكرته ولو اتخط في موقف مشابه هيفتكر نفس الكلام السلبي.

يعنى لو الأب أو الأم في البيت دائماً بتقول لطفلها أنه غبي وحمار ومش بيّفهم، الطفل ده في المدرسة ولو مدرس قال: أنا هسأل سؤال صعب والشاطر يحله، ممكن الطفل يبقى عارف الإجابة وشايف أنه سؤال سهل جدًا .. لكن لأنك أقنعتة أنه غبي هيقول لنفسه أكيد تفكيرى غلط ومش هيجابو على السؤال .

العبارات السلبية والعنف اللفظي يقتل الطفل وبتقتل قدراته ومواهبه.

ثانيا: هيتعود على الشتيمة، مش هيبقى عنده إحساس، مش هيحس أنه ليه كرامة، مش هيقدر نفسه، يعني هياخذ على قفاه ويسكت

ثالثا: الطفل لما يكبر مش هيبقى محترم، لأنه لاقى الأكبر منه بيشتم هيبقى عادى أنه يشتم، مش هيحترم الأكبر منه ومش هيحترم حد يعني الآباء والمدرسون اللي بيمارسوا العنف اللفظي ساهموا في وجود أفراد بلا قدرات أو موهبة ... بلا كرامة ... بلا أخلاق ... وبكده نكون قتلنا القتل ومشينا في جنازته .. ريينا ولادنا غلط .. وبعدين نشتكى من حظنا الوحش؟

الموت

قدرية الموت مسألة محيرة جداً .. أغلبنا إذا ما كناش كلنا مصدقين تماماً أن « الأعمار بيد الله » .. تمام .. وكلمة أجل الموجودة في القرآن بكثرة بتدل علي أن الموت مكتوب. بس مكتوب دي ممكن تعني حاجتين اتنين الفرق بينهم كبير، هل قدرية الموت تعني أن ربنا يختار لحظة موت كل بني آدم و كل كائن خلقه ؟ .. ولا قد تكون تعني فقط أسبقية العلم الإلهي بميعاد موت كل خلق الله !! دا سؤال مش مصدره رأسي وخلاص .. لأ فيه حاجات كتير بتشير التساؤل، .. لما تبص مثلاً على متوسط أعمار الناس، في الدول المتقدمة تلاقيه أعلى بكثير منه في الدول الفقيرة ، الناس يأكلو كويس، يشربوا كويس، يلاقوا رعاية طبية كويسة يعيشوا أطول !

لو أهملوا و أكلوا أكل ملوث و شربوا مية مش نضيفة وماتعالجوش كويس لما يعيوا .. هيعيشوا أقل .

البنّي آدم يلعب رياضة .. شرايينه توسع و قلبه يبقي أقوى يعيش أطول، لو شرب سجائر و أكل سمّنة و مايلعبش رياضة شرايينه تتسد أو يجيله سرطان و يموت .. يعني ربنا مافرضش لحظة الموت أهو ..

المسألة زي ذاكر تنجح، و زي من زرع حصد، و زي من جد وجد
موضوع الموت متساب لاجتهاد النبي آدم في البحث عن أسباب موته
وحرصه علي صحته، أكيد كان فيه لحظات بتتدخل فيها يد الله عشان
تنهي حياة حد أو عشان تمد في أجل حد لأسباب لن يعلمها إلا الشديد
القوي... والله أعلم بالميلاد و الممات ..

حلاوة الدنيا

كل حاجة في الدنيا أنواع حسب النية و الغرض من وراهم، أعتقد أن مش منطقي مثلاً أن صلاتي أنا تبقي زي صلاة واحد، بيدعي أن ابنه العيان بمرض خطير ماموتش ويبقي كل دا زي صلاة الزاهد في الدنيا، ليس طمعاً في الآخرة بل تصوف في حب الله .

بالرغم من أننا ما عندناش القدرة علي تقييم الصلوات إلا أنه مش معقول يبقوا زي بعض لأن ببساطة الدوافع من وراهم مختلفة جداً .. ارتباط النية والدافع بجودة النتيجة و نوعها و قيمتها الحقيقية مسألة حتمية للغاية . . ما أعتقدش إنه من الممكن إننا نوصل لنور ربنا ! بالنظر لمصلحتك ممثلة في إنك عايز تروح الجنة أو خايف تروح النار ممكن تتعبد طول عمرك لو عايز .. ممكن تستسلم تماماً للدين و ممكن استسلامك دا يدخلك الجنة فعلاً و ممكن ماتروحش النار .. كله بأمر ربنا، لكن مش ممكن توصل للنور طول ما أنت باصص علي نفسك . مش ممكن تشوف الصورة الكبيرة طول ما أنت محبوس في التفاصيل الصغيرة، الدين مليان تفاصيل صحيح؛ بس في تصوري مش عشان نتحبس فيها .. لا عشان بالنظر لكل التفاصيل الدقيقة هنتعلم طريقة تفكير .. هنتعلم إزاي الدين بيشف الأشياء المختلفة .. ولما نذاكر الدين

ألف نيلة ونيلة

اللي ربنا أنزله وتبعه لما نصدقه بس كما نتأمله جنباً إلى جنب مع الدنيا
إلى ربنا خلقها؛ هنقدر ساعتها نحاول نعرف ربنا فعلاً و نقدر نعرف
حلاوة الدنيا ..

الدين وسيلة للوصول إلى الله .

الأبوة

علي وزن « الأمومة » نتكلم عن الأب شوية .. الحياة دائماً مليانة بالمفاجآت أكثر من أي حاجة تانية والحياة مليانة بأخطاء الناس أكثر من أي حاجة تانية .. كل الأخطاء لها تمن بتدفعه أنت أحياناً ويدفع معاك ناس تانيين .. أعتقد مافيش حاجة أوحش في الدنيا من أنك تدفع ثمن غلطة مش بتاعتك، ولادك بيدفعوا ثمن أخطائك في تربيتهم. ماتزودش علي دول كان مسئولية أنك بعد ما يكبروا تفضل تعاملهم كأطفال و تختارهم وتقررهم و تحاول تخليهم زي ما انت عايزهم يكونوا .. لازم يكونوا زي ما هم عايزين حتي لو اللي عايزينه دا ماكانش مفهوم بالنسبة لك وحتى لو مش ماشي علي هواك .

علم ولادك اللي تعرفه و هم صغيرين ولما يكبروا إديهم رأيك لو عندك رأي شايفه ينفعهم .. لكن ماتجبرهمش عليه، لازم قرارات النبي آدم المهمة اللي هتتحكم في مصيره تبقي بتاعته لوحده لما ينجح هيشعر بالعرفان للقوس اللي انطلق منه بس هيشعر كان بالفخر لأن هو اللي نجح ولما يغلط هيلوم نفسه بس و هيتعلم من خطاه و هيتحمل مسئوليته كالرجال و الكلمة دي تنفع للستات كان .. بس كدا ...

تعرف تنقد ؟

أنت من حقك ماتبقاش موافق علي أي فعل أي حد بيعمله،
ومن حقك تنتقده و من حقك ماتقلدوش و من حقك تعلم ولادك
أو اصحابك أو إخوانك مايعملوش اللي أنت شايفه مش مناسب ..
لكن كل دا مش داعي إنك ترفض و تكره الشخص اللي بيعمل حاجة
أنت معترض عليها .. حتي و إن كانت غلط من وجهة نظر الدين، أنت
تخليك في نفسك كل واحد يدور علي الحاجات الغلط اللي هو بيعملها
ويحاول يغيرها، مالكش دعوة بالناس بتعمل أيه غلط، أنت مالك أنت
؟ وبعدين هي وحشة ياسيدي ماتسمعش الكلام الموجه ليها، خلاص
خليك أنت كويس و اسمع الكلام الموجه ليك أنت و غض بصرك !
هو يعني غض البصر في القرآن دا جاي علي أساس أن كل الستات
متغطيين؟؟ أمال أنت هتغض بصرك عن أيه ؟

الحرية « شخصية كانت أو غيره» طريق مزدوج رايج جاي مافيش
حرية من ناحية واحدة .. و أنا شخصيًا مش هاعيش في مكان أبدًا
بيفرض عليا و علي أهلي « بالقانون وبالجبهر » أي نوع من أنواع الهدوم
.. أنا عارف أنا عايز ييتي شكلي عامل إزاي ويدل علي إيه زي زي كل
الناس .. كل واحد حر في شكله عامل إزاي و يدل علي إيه كل واحد

حر في طريقة نقده للأخر .. كل واحد حر في شكله و في الانطباع
اللي بيديه شكله « عنه » عنه هو أنا ماليش دعوة ! يبقى كل واحد
يلبس اللي هو عايزه .. مكشوف أو متغطي يحط ريشة علي رأسه،
ضيق، واسع، مدلدل اللي مش عاجبه حاجة مايلبسهاش واللي مش
عاجبه حاجة تانية لابسها حد تاني مايبصش عليها، عايز تلبس اللي علي
مزاجك؟ يبقى كل الناس يلبسوا اللي علي مزاجهم ، مش عاجبك الكلام
؟ إنت حر .. الأيام دول و بكرة تنال ما تستحق ... عرفت إزاي تنقد
الآخرين و لالسة؟!

أسرار الموتى :

في أحد الأيام

كان يعمل أحد عمال المدفن ليلاً .. كان يدفن ميت (ربنا يرحمنا)
وبعد أن انتهى جلس بجوار بيته (الموجود بجوار المدفن) وبعد ان
ارتشف رشفتين من كباية الشاي سمع صوت تزيق باب فظنة أحد
الجيران خرج في الليل، ولكن بعد أن طال التزيق سعمة باب مجري
وهو يعلم أن جميع جيرانه أبوابهم خشبية فدبت في نفسة قشعرية
ولكنه دخل بيته مسرعاً و أوهم نفسه أنها الرياح
وفي اليوم التالي وفي الصباح الباكر حيث الشمس الدافئة والطيور
المغردة استنشق النسيم العليل وهو يعلم أن هذا اليوم سيكون كسابقه
بعض الأعمال ويذهب للشاي ثم النوم
وفي منتصف النهار كان يؤدي عملة الذي اعتاد عليه وأصبح يؤديه
بروتين؛ لاحظ أن باب أحد المقابر الحجري عليه آثار أقدام والباب
غير محكم الغلق فتذكر سريعاً ما حدث بالأمس .
ثم نظر إلي داخل مبني المدفن
(يتكون المدفن في بلدنا من المقبرة داخل الارض وحولها حجرة لجلوس
الزوار)
فوجد رجل حزين فشعر بشئ مريب لا يدري كيف يفسره عندما

شاهد هذا الرجل وقال له بعفوية:

لا يجب أن يدوس المرء على مكان باب المقبرة

فنظر إليه الرجل بنفس الحزن وقال :- أعلم

دون أن يشعر بالقلق والفضول الذي يطل من عين العامل .

فقال له بعفوية مبالغ فيها :- هل مات لك شخص من قريب ثم تذكر

أنه لا يجب أن يتدخل في تلك الأمور وانتظر من الرجل كلمة تصده،

ولكن الرجل رد عليه :- ابنتي... منى.

فاستغرب العامل من الرد دون الإهانة، ومضي في طريقة وفي نفس

اليوم حين جاء الليل وفي ليلة شبه مقمرة سمع الرجل نفس الصوت

فتذكر كل الأحداث بسرعة وشعر بالغرابة الشديدة لأن هذا لم يحدث

من ٣٠ سنة أن يتشبث بشيء هكذا، ويسترجع الذكريات بتلك السرعة

والدقة

فقد كان لديه تخلي كبار السن. وشعر بأن هذا اليوم مميز كيوم ولادة

طفل أو موت أحد الاقرباء.

فذهب إلي مكان ذلك المدفن بالذات فوجد أن باب المدخل الحجري

شبه مفتوح فشعر بشيء خلفه فجأة فنظر والخوف يعلو وجهه.

فوجد فتاة بثوب ملطخ بالدماء تسير بخطوات بطيئة جداً ومتهالكة

كأنها لا تريد إلا المشي دون التقيد بالوقت.

فتذكر اسم الفتاة فقال وهي علي مقربة منه:

إلى أين تذهبين يا منى

فنظرت إلية بنفس برودة المشية، ورفعت ثوبها الملطخ بالدماء أمام

عينها وقالت: رايحة أجيب امو omo لمن لا يعرف أمو مسحوق

غسيل كانت تريد تنظيف الملابس

الخلاصة

ألف نيلة و نيلة هيا حالة وليست مجرد كتاب يقرأ
شعرنا بيه « أحمد السعيد - مصطفى عامر » في فترة
كتابته التي تجاوزت الستة أشهر ..
التي أنتجنا فيها عملنا هذا، و إن كان أول أعمالنا
ولكننا نرجوا أن لا يكون الأخير وأن يتقبل الناس
كتابتنا مع أنها واقع وليست مجرد آراء فردية أو شاذة و نرجوا أن
تكون بصمتنا هذه علامة في قلوبكم قبل أذهانكم.

مصطفى عامر

obeikandi.com

رقم الايداع / ١٣١٩٥ - ٢٠١٣ ١٦
الترقيم الاثروي / ٨ - ٣٦ - ٥٣١١ - ٩٧٧ - ٩٧٨



ليلين للنشر
والتوزيع

مطبعة ابراهيم سالم